

## **Rezolucija Kneževine Andore o održivom turizmu**

Smatrajući da je Evropa jedna od najcjenjenijih turističkih destinacija na svijetu i da se očekuje rast turizma u Evropi u budućnosti;

Uvjerena da turizam predstavlja značajnu ekonomsku aktivnost u Evropi i da je pokretač zapošljavanja naročito mladih;

Uvjerena da je investiranje u obrazovanje i obuku jedan od ključnih faktora kako bi se ponudile kvalitetne turističke usluge poštujući prirodu i urbane zone;

Smatrajući da masovni turizam treba ustupiti mjesto kvalitetnijem modelu, koji bi više poštovao okolinu, modelu koji kombinira ekonomski rast, očuvanje i uljepšavanje pejzaža i ugodnog životnog okvira za stanovnike;

Naglašavajući da kulturni turizam u evropskom frankofonskom prostoru igra važnu ulogu u promociji kulturne raznolikosti, poboljšavanju razmjena i shvatanju različitih kultura;

Konstatirajući da se industrija turizma u regiji Evropa suočava s velikim brojem novih izazova među kojima su i digitalizacija distributivnih kanala, promjena ponašanja konzumenata, prelazak na ekonomiju ljudskog iskustva, demografska evolucija i sezonski karakter aktivnosti;

Podsjećajući, u tom smislu, na uticaj i mogućnosti koje nudi digitalna tranzicija o novim mogućnostima pristupa potencijalnim turistima i optimizacije turističkih iskustava;

**Parlamentarna skupština Frankofonije za regiju Evropa, zasjedajući u Andori od 21. do 24. oktobra 2018. godine, s ciljem podsticanja sektora turizma dajući prijedloge u smislu održivih politika, ohrabrujući korištenje dobrih praksi i jačajući saradnju s ciljem rasta atraktivnosti, konkurentnosti turizma i vidljivosti Frankofonije,**

Poziva parlamente i vlade država regije Evropa da promoviraju cjelovite turističke politike saradnje kako bi se poboljšao kvalitet lokalne turističke ponude koja treba postati sastavni dio logike održivosti uspostavljajući, između ostalog, politiku očuvanja i uljepšavanja pejzaža, zahtjevnu klasifikaciju turističkog smještaja, zakonodavstvo koje će spojiti politiku smještaja za lokalno stanovništvo i turiste i tehnološke alate kojima se poboljšava iskustvo turista;

Ohrabruje svoje vlade da rade na stvaranju programa kvalitetne višejezične turističke obuke naročito za turističke vodiče, osoblje koje radi u objektima za smještaj turista i u programima zabave i da predlože stažiranja u periodima kada nije turistička sezona kako bi se poboljšalo poznavanje turističkih tačaka;

Naglašava da bi bilo dobro regulirati online platforme kako bi se osigurala, s jedne strane, tačnost informacija ponuđenih potencijalnim turistima i, s druge strane, povjerljivost podataka koje se stavljaju na mrežu,

Pozdravlja doprinos civilnog društva promociji novih oblika turizma kroz naročito društvene mreže, grupe građanskog djelovanja i udruženja.